



This e-book was digitized from an original copy by the West African Research Association for the African Language Materials Archive (ALMA) project. Original funding for this project was provided by [UNESCO](#) and the [Council of American Overseas Research Centers \(CAORC\)](#) in cooperation with the [West African Research Association](#) and [Columbia University](#).

Please see the following web sites for more information about the ALMA project, contributing authors, and more titles in the series.

- Digital Library for International Research catalog: <http://catalog.crl.edu/search~S16>
- African Language Materials Archive (ALMA): <http://www.dlir.org/e-books.html>
- African language materials including interviews in video and PDF versions, documentary video, translation work, and bibliographies can be viewed at <http://alma.matrix.msu.edu>.



## GIMDI PULAR

---

## GIMDI NGURNDAN E TAMA'U

---

Poèmes de la vie et de l'espoir

Yubbufo  
Moodi Usmaani Paraya BALDE

Weebitande Dudal  
B.P. 4729 CONAKRY

## NAARUGAL

« *Jangen , Alla farlii jangugol,  
O fodii e mun le baraaji mawdî to warjagol »*

Maaku Cerno Aliiwu Buuba Ndiyan

Mi yedii oo ballafuyee doo :

- ◊ *Neene an jaara e baaba an boora hadubé  
lan ngayngu, neirin mi giggol nokondo  
mun e peewal e gomdinde Alla ko gooto,  
Muhammadu ko nulaado makko,*
- ◊ *Kotiraabe an fewnanbe lan laawol e  
sonnaajo an doftiido e gedalbe an  
yidaabe,*
- ◊ *Jamaa Gine yangiido mo seedaali e  
tama'u.*

Yaafee lan ellaaji din e yakkereeji din e nder dii  
gimfi; wurton mi, mi fewna laawol. Ko  
yahoowo feggotoo !

« *Mi do jantora himmudî haala pular,  
ka no newnane fahmu nanir jabugol »  
« Coongel hino muyta e barme ndihal  
yarakal, jaabu ronka no siibora kal »*

Maakuuji Cerno Muhammadu Samba Mombeya

## HUNORDE

Ko teddungal haal pular en e kala himmando jangugol pular. Deftere haqiiqaare hebike doo ko wallitoree. Hinde innee " GIMDI NGURNDAN E TAMA'U". Mido nomita doo cobbuloy tatoy fii nden deftere: fii windudo on, fii yiyal mayre on,e fii mbaadi gimdi din.

Ko Moodi Usmaani Paraya Balde woni ko windi nde. Ko ka dudal mawngal Kankan mi andi mo. Piiji tati no metti hebudude: iwdi moyyiri e needi e gandal. Hebugol gootun e dii doo e majji no yelaa. Kono mo hebidi dii tatii non haray moyyere hatti. Awa Moodi Usmaani Paraya no wondi e dii doo fow. Ko mo jangii deftere makko nden andata dun. Jangugol non wanaa sarti, sabu no gasa buy no buri Moodi Usmmani jangude.

Ko woni sarti, ko faamugol ko jangi kon. Moodi Usmaani banginii doo ko faamu makko ngun yaaji kon, ka o windi, o wallifii e pular don. Be innay Annabiijo ko hoore mun adinoo duanaade.Yo aaden bangin ko yidi haala mun kon tawo si yida haala godso. Muynaaka no hecci jannaaka, no buri ka lewjude. Mo no yeddi, yo o udditu deftere « Gimdi Ngurndan e Tama'u ».

Telen ka yiyal deftere nden, ko pular siiwaado siiwitaa woni e mayre. Kono wanaa fii pullo tun, maa Fuuta tun windaa doo. Ko fii leydi ronaandi porto wieteendi Gine ndin fow wowlaa doo, iwi ka geeci haa ka pelle Fuuta, ka dunkijji Jaaliba e ka pitaaji Funnaange Jlaamo.

Moodi Usmaani no yeebi, weebiti,wacci kala  
ŋariji e ŋalawji laral leydi Gine. Wanaa non fii  
hande leydi ndin tun o yewti, o yejjitaali hanki  
mayri on.

Dartinoobe porto wa Bookar Biro e  
Saamori, kuude mun e mijooji mun no fillaa  
manaa, yurmina. Tampereeji jamaa din e  
fewndo nguya men yejjitaaka. Gimdi Ngurndan  
E Tama'u ko fertordi laawol fii jango Gine on.  
Korun an bedsun an e leyyi leyyi alaa e majji  
fes. Leemunneere nden ko ngumre hay si bitti  
bitti no ton. Keereeje den sagginiraama woo si  
de fow hide tawaa. Oto on dogii wo si ruuje den  
nayii non no selli . Si on jangii Gimdi Ngurndan  
E Tama'u, on faamay dun...

En sakkitoray fii mbaadi gimdi din. Ko  
hondun wadi gimdi gimdi ? Wanaa yettudo  
karambol windi woo windi gimsol. DBGJ

Gandal no moyyi e mun, kono gaynataa;  
bee neejal tawee ! Tigi tigi on, windugol gimdi  
ko e okkeede tawaa. Sabu ko yo miijo ngon e  
etoodi kongudi din yaadu, feppa, nanondira.  
Kongudi gimdi ko kongudi etaadi, nepaa,  
feppitaa, fottinaa, fotinaa, nordinaa..

Mono jangude" Gimdi Ngurndan e  
Tama'u , si no faalaa jangay tun ewnoo, mono  
faalaa jangay yerginira wa jaaroowo ( wobbe  
wia beytoowo). Kadi yimoobe men no waawi  
yettude di watta gimol. No jangiraa wo no  
feewi, no lewji.Gimdi din e gimi wodsondiraa.

Etirdi gimdi no woodi, wobbe no jangi, no andi fii din fota; wano Cerno Abdurahmaan Ba Labe maa wano Al Hajji Mamadu Bela Dumbuya. Moodi Usmaani Paraya Balde men holiii gandal din etirdi gimdi. Kono ka deftere makko, ko o nandi ko wa ekkitotoodo yaadu. Bay ekkekko yaadu laday tawo, ontuma, o dabba ka o jogoo, o tuggoo.

Si feyyii don seeda, o hawka tuggordu ndun, o yahana hoore makko. Moodi Usmaani huutor etirdi gimdi di o andi din haa seeda, haa o tawi o waaawii yahande hoore makko.

O mari din etirdi too, o sincani hoore makko goddi goo labaadi buri di o joopinoo e mun din. Mo jangii " Gimdi Ngurndan e Tama'u " o faamay dun.

Ko kuude waliiyu Moodi Usmaani golli doo. Be innay ndiyan rewtaay ilol. Kanko o rewtaay ilol sincannoobe en windugol waajoo, wallifoo e haala pular. Ben ko wano Cerno Muhammadu Samba Mombeaya, Cerno Saadu Dalen, Cerno Aliiwu Buuba. Ndiyan e waabe wano ben. Allaahu yo Moodi Usmaani Paraya Balde fooyu windude gimdi fotirdi nii, Alla yo haal pularbe buy neebin mo, Allaahu yo beydan pular bantal e kutu.

Dokter Mammadu Alfa Jallo  
*Hooreejo Rendirde Jande Haala Faransi  
ka Dudal Mawngal Konaakiri*

# Leydi Gine labaandi

Yedeede wa leydi labaandi Gine  
Hino immina bernde jom yiugol.  
Ndaarii dii geeci subaadì Gine  
Njaareeji sisordi jalbude tal.  
Wano Kasa e Ruum ka nder baharu,  
A taway hen yaasi ko jom newagol.  
Gori-gori dee ledde wiaade kokoo  
No yeyoo e heneere nde jom buubol.  
Dii colli raneeji iwaydi ka woddi  
Yiaa hidi wiira wa pande kisal.  
Coorambi sedaadi wa ciifi nete  
Sufitoo haa duuda e ngal naangal.  
Dee duule ka kammu no moyyna hen  
Nooneeji pirinti fotindi laral.  
Feyyi don seeda yawaa e petun,  
A yiay don laade no jokki aral,  
A yiay don guuwe no toowa jola,  
De juddoo haa duuda e nder fontal.  
Ndee seere dariinde ko Kaakulimaa.  
Hubindii Konaakiri ca'al hawtal.  
Kindiya e datal, e ley Gangan,  
Ngon hello no haari neemaaji copal.

Si a nangan hewtude Fuuta Jaloo,  
Kaaweeji no sabbiti maq e datal.  
Baawo maa hollaande wanaa fii fello,  
Tugijje e maaro sifaaji misal.

Ndar Keebu e kewto e maaro basu  
E boowe e kocce e wurooji jeyal.  
Dee pelle mbuluuje de haynotodaa,  
E ko den wadi Fuuta e leydi yawal.  
Ko don dii bulli subaadı dajaa,  
Yaltoysi e leyde wa jaa parawol.  
A taway don candı e maaje ndiyan,  
Baafin e Gulumbu e Kunkurewol.  
Si a feyyii saare no wiee Maamun,  
Hewtaa Dalabaa ka ley pellal.  
Hey Tinka ka darii e dow tutateeri  
Dee ledde sapen manaade daral.  
Wano Timbo ka tumbo e hakkunde pelle,  
Maandaade ko feyyi no yoni andal.  
Nde dotal maa hewti ka tumbere Fuuta,  
Tawaa don Timbi e leydi demal.  
Barkeeji no heewi e ndin leydi,  
Nai ndaama e dammi no jokki tebal.  
Haa Labe to labaabe ka boowe sadaa,  
Dee jawle e gande no wonti maral.  
Wano Maali e Ndaama e leydi Bajar,  
Dee cehe ka keeri no ayni datal.  
Iw Fuuta, dupaa, Funnaange yahaa  
Mannden ndii leydi ndi Jaalibawol.  
Mannden ndii leydi ndi Jaalibawol,  
Haa Jaaliba ! Jaaliba ! maayo kebal.  
Kollaade remaade e ledde fohe  
Serindii ngon maayo wonii giggol.  
Taariika wadaado e ngon hello,  
Abadaa wadi Mannden leydi fural.  
Kerawaani, Faraana araa Sigiri,  
Hino tawti Kurusa e nder limodal.

Kanjeere no duudi e ndin leydi,  
Iwi nano haa jaamo, pudal e mutual.  
Neesila seekaado e leydi Gine  
Hino yahi haa Kankan lanni datal.  
E nden saare nde mangu e binde Miloo,  
Fii diina e ngalu yonay sifagol.  
Waasolon, Manjaana ka bee fulbe,  
Ngynaaku no lutti e ngal musidal.

Jokkii dee pelle de Fuuta Jaloo,  
Fewtaa Funnaange ka jaamo laral.  
A taway don ledde, yiaa don delbi,  
Pitaaji e pelle no feyyi sifal.  
Kahijje e cimme dariice no feewi  
Hino fotti e kammu no jonna kulol.  
Kisidugu, Gekedu e Zerekore,  
Ko ceé de ngeygu e ngol keerol.  
Simandu e Nimba no toowi darii ,  
Hino wondi e njandi e dow luttal.  
Tutateeri no heewi e ngon hello,  
Wano tugi e kafe dapal fuufugol.  
Danden ndii leydi ka barki sadaa,  
Dii candi e ledde nariiji tawal.  
Yedaado wa leydi labaandi Gine,  
Yo o huuwu o golla e hoore dewal.

## *Bookar Biro*

Heditee musibbe fii Heewa palaande,  
    Bookar mo Neene Jaari e Almaamiwal.  
Mi sergita fii on mo dogataa diwnataa,  
    Ebbudo hiwude ndimu ngal laral.  
Beytee yo jamaa, askon on gorko hulaado,  
    Duuda hareeji e guuwindiral.  
Lutton hedaaade fillayee yanaaku,  
    On seediyankeejo jooma bural  
Tinee Bookar, feewa tafal, duuda mirin,  
    Gite mun ka hubbi no jonna kulol.  
Ndaaree yariiji Fuuta e mbeleendi mu'un  
    E wurooji e gande ka tawti dewal,  
Kollaade e pelle e maaje ndiyam  
    E pitaaji e boowe ka feyyi sifal,  
Heerordo maqaama e sendude diiwe  
    Ahodaade taweede e ngal kawtital,  
Humiingal Timbo ka saare nde laamu  
    Aldirnde yedeede jom meetelol.  
Almaami soriya waalanii timmugol,  
    Nden mayde wonani julbe fow juhal.  
Dun woni sabaabe hawre sifaande  
    Ka lurri soriyaabe e alfayaabe jeyal.  
Fuutaari jilii laahawla e ande yanal  
    Bone Alla dariibe no hubba cergal.  
Sokotoro e Caccakoo soriyaabe  
    Kobbidi himme jogagol ngal lontal.  
Tawi Paate Baadikko e Bookar Baasamba  
    Fottaali e mawbe laral fii lontondiral.  
Sariyaaji di Fuuta no accani mawnan  
    Joodsaade e jullere laamu huuwondiral.  
Kono Bookar jom cuucal no wontani  
    Fuuta denyere sabu ngal berngal.

Himo woondi o jeyay, o halora Fuuta  
O dolnina laamu Timbo, o jogoo keerol.  
Wata annasaara naatu Fuuta meha  
Ndimu e diina e maral e tawal.  
Iwi nano haa jaamo, pudal e mutual;  
Fuuta fow nodditaa fii diisondiral.  
Dun gaynaali hawre hawtube gebal  
Laamaade Timbo e Fuuta ngal musidal.  
Neene Jaariiwu aani waajii Bookar :  
« Hulu jogaaji Paate ko jom mangal »  
Bookar jaabii : « si a nafuno baaba,  
Mi hettay laamu mi jogoo bural,  
Si a yawino baaba, a hebay njoddi  
E biibbe maa ka dalaa gebal. »  
Tawi porto en joodinoke ka keeri;  
Ko wonannoo Fuuta ko fottugol dartagol.  
Tawi gere on hubbii hakkunde hawtube,  
Ko condie doole dajaynood jom polgal.  
Koneeli Bookar nangi laawol Fugumba  
O fotti e Cerno Ibrayma jom taarugol,  
Be yiltodi Fugumba ka saare mangu.  
Bookar no waddii Morikebe ngal pucal  
Ka saare diina binde fello badiingo.  
Be naatiri jemma be sabbii weetugol,  
Taba tappaa jabbittaa, dun nootitii,  
Moobaa jamaa fii taarugol ngol meetelol.  
Kankalabe, Timbi, Koyin e Buriyaa  
Fooduyee Hajji, Fugumba e Labe daral,  
Dee diiwe jeetati ka tawti Timbo,  
Meetelli mun bornaa koal ngayuwal.  
O woondi don jaawirde defte e dandugol  
Galleiji, jawle e dow munpagol.  
O hoolii si loirii nder loiray ka baawo,  
Dartaade aybe gasii woo e nder pottal.

O yurmaa Fuutaari ngayngu e haasidi  
O andi alaa no lurrall addira ngal polgal;  
O aani ko Labe feccere Fuuta e yaajugol  
    Woniraa csoftaade Timbo fii laamegol.  
Tawi Labe hulii Bookar, saatindo doole  
    Hurgayde diiwe de heyä e nder jogal.  
Mawbe Buriya e Timbo todpii Alfaa Paate,  
    Be haldi yedugol mo laamu e almagol.  
Be yawti sariya fii taarugol ngol meetelol  
    Bay dun ko Fugumba accanaa jinnugol.  
Dun lolli tun, Bookar immii jahal  
    Buriya e Timbo fii fampagol,  
Koneeli bewdi, yoobiidi pinka,  
    Manaadi ngorgu e suusugol maa yaanugol.  
Timbo felli haa kure saatii lannugol  
    Si Bookar hubbi condii ka yottagol.  
Sori Yilili laawi e ladde e nder kejal,  
    Baadikko Paate suudoyii hersugol.  
Daade jeedidi o felli Bookar Biro  
    Okkaado cuuco lootii wooporal.  
On yetti kural kanjeere loowi joga,  
    Sahimbini oo mawdo soriya ka lontagol.  
Yurmeende hittaa e bernde dabboowo laamu,  
    O yiataa, o nanataa haa hendagol.  
Bookar sowii aybe mun nder e baawo,  
    Wadii satteende ka Fuuta lurri e gerdugol.  
O darii o nangi tiidinde laamu makko,  
    O neli e Saamoodu be haldi nanondiral.  
Sabu porto en bannii koneeli e keeri din,  
    Hewtayno saai ka be immanii naatugol.  
Faransi faalaaka Engele en joodoo  
    E ndii leydi ka ngeyngu mabbe sabbii gebal.  
Be humpitii fii ngaynguuji loindii Fuuta,  
    Tawi lambe diiwe haldii murtugol.

Almaami Bookar immini koneeli mun  
O anniyii donkinde Muusaa Moolo foltagol.  
O nangi laawol Daara Labe ko finaa tawaa,  
O tawi Alfa Yaaya lando Labe on Bantinel.  
Ka sera nden saare e juma hare hubbaa,  
O wii o hollay Fuuta ko woni langal.  
Bookar saani Mori Kebe waddii Burungu  
Taba tappaa, pinkaaje oolii warugol.  
O wugganii aybe, o fertii koe  
Ado barme den oofinde few ngal pucal.  
Woppaa oo gawlo cuuco jokki Bookar  
Mo hitowil njanil ngil iidugol.  
Gere rocci bay sikkaama polgal arii,  
Bookar hammiri Kaakirima suudagol.  
O neli e Moodi Ahmadu o maayaali,  
Yo on hewtir mo faabo e tinnagol.  
Moodi Sori bii Bookar nodditi koneeli,  
Nele Almaami Ahmadu ittaa faabagol.  
Wiide yo donko ka lando wattaa kullii,  
Konu duudfungu imminaa wallitagol.  
Bookar yalti Kinfaya hewti Petel Jiga  
Ka sabpii mo Moodi Abdullaahi e konuwal  
Monson Keegi mbaaraagu ngun hiji,  
Yeesooje toowi, aybe fokkiti dogugol.  
Konu aybe saakii e ladde ka laawagol,  
Bookar naati Timbo bay dajii polgal.  
Nettaali Jaaaliba felli Moodi Abdullaahi,  
Fuuta huli hulde fii ngal cuucal.  
Sori Yilili hammiri Sigiri noddoygol  
Portooibe gabinoobe e ngol keerol.  
Liite den wuttaa ka hollaande Timbo,  
Kono pullo jabanaalj porto en joodagol.  
Bookar Biro folli lambe diiwe e misidaaji,  
Aybe makko immanii nanondiral.

De Beckman lutti mo Timbo ka fadi jamaa,  
Neene Jaariiwu lutti suudaade e buruwal.  
Tawi Bambeto no werni Almaami Bookar,  
O hiitanii Fuuta rondaade kaayal.  
O wi'i Almaami warete folletaake,  
Fuuta dadsoytaa ninse janfagol.  
Moodi Sori mo Bookar tuttataa jaamta,  
Koneeli giddani Timbo fii habugol.  
Fottaa Pooredaaka Bimbi Noowaambur  
Condi fetti, kure wuudi, fewtaa lajal.  
Yaridaado njuuri ta aamu yarideede kahi,  
Dikkaado lando ko e puccu foti yanugol.  
Mo hawa mun eesaynoo kore ka cuudi  
Yamiri yo Fuuta heblano fellugol.  
Piindi Fuuta saami e leydi lutti hen,  
Bookar hundaa ka buru daande caangol.  
O dartii dartaade, haa laddé fooli mo  
E ndee aseweere moggo ndantawel  
Mo yahaali Pooredaaka, yahay daakapoore,  
Hiiti Bookar Biro mo andaali mupal  
Sariya qakkudo no buri waasude sariya.  
Mo laamor doole yaniray doole follegol.

1994

# Alfaa Yaaya e suufaa-be mun ben

Alfaa Yaaya laamiido Fuuta yedaa kamal

Halfini nguu puccu ngu duubi e dow horagol,  
Suufaa-be tato be o sattinani kongol :

« Ceedu ngun tiidi, puccu an waawaali cubal,  
Ornee ngu hen fow, dabbanon ngu kudal  
E ndiyam, ngu jaama, ngu yara e baawo kuugal.  
Artiron ngu law,sabu dun wonanan finnitagol.

Suufaa-be anditon non dey mi tayay koal  
Adiido wowlande lan ngu luttii e lajal.

jooni non no e juude mon nangee datal ».  
Suufaa-be nangi datal e mujal dowugol

Nguu puccu nayeewu halal oo jeydo laral.  
Nden hitaande ceedu ardu e ngal naangal

Sunnungal Fuutaari ka wonti mehal,  
Tawi yimbe e kulle no tampa lajal,

Kono lando no banni sokholaaji pucal.  
Feyyi jonte jowijje jahal e fadaf

Suufaa-be hewtiti dowaa ! tawi ngal langal.  
Alfaa Yaayaa wano woowiri pottaa fertal;

Himo mowla kaa kaafa e jonde jullal :  
« Puccu an ngun goy lmi yiiraali ngu ndargol »

« Hi ngu fowtii », e wie suufaajo ko jom mangal.  
« Honto nii ? e wie pullo, ko jom hitowil »

« Ka wodditii, ka woddii andeeji adunawal.  
Hingu daanii moggo yenaande e nder karewol  
Jiga duteeje labaade e seebude yakkirgal.

Eel yo bee ! puccu maa doftiinngu manaa neagol ».

« Yewtan no laabiri feewi, yo bii bonowal Taw  
non si ngu wuuri ? ngu firni ? ngu waawi datal? »

« Hingu jaabi sundulla, ngu uddi gitai,  
Bukkol hino yoori no tawti leebi e daral,  
Kadi reedu no yuufi wa nii jengallewal.

Wata aanu fii wurde pucal, yaa ! moyyo tagaa langal.

Heege e donka, nguleendi e jaangol kala dal ! »  
« Ko cfun woni mayde sorii, yo an maccangal ? »

« Yaa ! Alla,dandan wiide ko woni cattal.  
An non hida yewti ko laabi misal henagol,  
Kala yewtere lando no feewi e dow rewegol ! »

Mbatulaabe tawaabe jili hulugol.

Woni moyyube haabe jogii diwnol.

Alfaajo kejal hawtii daragol,

Jungal nanal diwnii sabu ngol monagol,  
Nde jaamo no sorta kaafa ka fii warugol.

Nettaali newaare yalti e yeesowal;  
Alfaajo wii,suufaajo ko jom hudegol.

Onsay o hayli hoore, jottii e ngal jullal;

Hari laawike andike suufa ko jom neejal;

Haldaybe njofinde oo moyyo mo meetelol.

Alfaajo adinoke yewtii kabaaru lajal,

Naatii e pirci warraadi yoyugol.

Onsay o henkiti jaleede e weltagol,

Dun non si wadii alfaajo ko jom welugol.

Mbatu ngun jali don jalde haa yalti kulol,

Bay wewlin lando fijooji dajal haqqil.

E sabu suusude, faamude maabbe e dow laabaf,

Be yedaa jogagol gundooji e ngal laral.

Haqqil innaaka gebal okkaabe bural.

Baawo doo laamiido ko moyyo, ko jom dokkal.

Tentinen : Ko Moodi Mammadu Alfa Bari  
jammaado Bari Mat (Yo Alla hinno mo  
yaafsoo), wallifii ngol gimsol e haala faransi.  
Min Usmaani Paraya Balde, mi firi ngol e  
haala pular, mi yubbi, mi etii yergusngol. Ko  
Moodi Mistahul Bari wonnoo ko watti ngol  
gimsol Moodi Mammadu Alfa Bari e nder  
destere nde o windi ka haala faransi.

# Almaami Saamori

Heditee musibbe mi yewta on fii Saamori,  
Andon ko gorko nanaajo yondo e jom bural.  
Dapeede makko ko Kerawani, Maniyanbalandu,  
E fewndo saa'a mo leyyi -leyyi gerdegol.  
Cukaaku makko, oo janguno, o woddini Qur'aan  
Habugol o yiidi, o watti don non sawrugol.  
Nder yirde makko, o feyyi yeeso, o wakkilii,  
Oo andiraa sifa suusugol maa kalfugol.  
Non nande goo himo yalti woddi Keerawaani,  
Bee bombe naati ka marga mafbe e lancugol.  
Bee nangi tun hay yurmataake yedaabe Alla  
Musminde dankoo Saamori sifa ngel gorel.  
Bay fiddo on andii e laawol on kasaara,  
O fawtitii fii hettugol neeneejo makko e nder kepal.  
Warroobe non duudaa e m'en dey anditon,  
On waddo dun hettay baraaji ngol yurmegol.  
O lutti don kurkaade yangoo e multugol  
On lando waddo on jiidiraawo e nder jogal.  
Nder hen o wonti hooreejo konu, o wakkilii,  
Haa hewti non dii duufi jeefidi haldigal.  
O totti don musminbe mo, o waynitii  
Fii artugol joodoo Sanankoro gollugol.

Iwde don, o nangi cippiro no anniyii  
Moobay diamaaji e fedde wootere laamagol  
oo laamateeri fontii e leyde no muncatun  
Kala ebbube fii dartagol maa saltagol.  
Diiwe sappo sincaa ka leydi, koneeli buy  
Darnaa no ayya egollugol maa aynugol.  
Golleeji fow feydaa no barka e leydi ndin,  
Jandeeji din, mbaylaaku ngun, tawi ngal demal,  
Lislaamu on jokkaa ko keldi ka nder jamaa,  
Sanamunke en teriaade geddi be rewaa dotal.

Almaami Saamori taaranaa ngol meetelol,  
    Sabu laamu makko e sattude yeddaa dewal.  
Bookar Biro Almaami Fuuta hino hoolinoo,  
    Saamoodu dey ko o gorko yondo, kojom bural.  
Jlaawoore makko aldaa e sulfu maa jeejegol,  
    Yamirooje makko dun sattataano ka jinnugol.  
Wano Waasolon ndin leydi Fulbe ka laabi poy,  
    Kodooli buy sunnaa, reaa woni caabugol.  
Hay biddo makko mo o neli Faransi ekumpital,  
    Waraama sabu hoolagol porto en ko bejom bural.  
Dun woni sabaabe buy eggude maasuudagol,  
    Jamaaji aani fii jaadugol ngil buutowil.  
Portoobe ben tawi faale mabbe ko hendagol,  
    Dee leyde takkiide serindii Jaalib(aw)ol.  
Teliren Sudan, hibe jokkunoo fii njaggugol  
    Oo laamateeri Almaami Ahmadu e huurugol.  
Haa jande goo, oo mugutigijjo, ko Faabu Kee  
    Kobbidi e Borjni, no yawti keerol ngal laral.  
Borjni Desbord e yimbe mun yiltaa piyaa,  
    Suufaabe Faabu no iwri baawo fii rattagol.  
Almaami hino yiidi yewtee, o andinii dun porto en,  
    Awa kanko kay sattaano jikku si ko teddungal.  
Dun fow hadaali be bonnugol ngal haldigal,  
    Be nangi Sigiri, be addi don koneeli e gardugol.  
Saamoodu landii lambe goo wano Ahmadu,  
    Yo be wallindir fii dartagol portoobe arbe fii lancugol.  
Ngon miijo mabbe si jinnano haa keldi kes,  
    Portoobe ben hebataano feere fii foolugol.  
Koneeli Faransi iwri Jlaamina, naati Kankan,  
    Felli don, feyyaa Bisandugu muncugol.  
Dun fow hadaali be rattiteede e leydi ndin  
    Haa takko Bamako, be naatataa hay ebbugol.  
Saamoodu dartii wakkilii hino anniyii  
    Portoobe ben yaltay ko yaawi e ngal laral.

Saamoodu woondi o accataa njaggoobe en,  
Joodoo ka men fii huurugol maa jattugol.  
Duubi sappo e jeedidi, himo angisii  
Fii cippirooji e eggugol kadi dartagol.  
Haa nande goo portoobe ben juhi Saamori,  
Hendii mo Gelemu, be watti lando e nder jogal.  
Oo wiuno dey bay porto en nawrii mo Kaaye fii jaawugol,  
Ndee mayde dey buranay mo wurde dii hersugol.  
Cappande jeegoo duubi Gine tampinaa,\  
Kono njaggu fow hewtante saai ka booragol,  
Sabu laamu ko ngu tiidi woo maa satti woo,  
Yiitante feere tuma follegol ara lontagol.  
Andaa musiddo ko laamu Alla jom huunde fow  
Woni miwdataa abadal'labaadi e dow genal.  
Yaa Alla ! seeku e bawde maa,den lannataa,  
(R)okkaa Gine bantal njanal kadi buttugol.

1976

# Naange Kawle-

Hinge suudinoo ka baawo duule,  
Nge sabboraatama'u mo cembe,  
Nge noddaa ka yangiji jeere.  
Naange nge sowto saatiingo !  
Naange peeral fajiri !

Hinge suudinoo ka berde immiide,  
Hinge dabbitee ka buguuji, ka caabeeji  
Ka hurgooji njagguuli, ka tarawooje,  
Ka koe hulbinaabe e yawitaabe.  
Ko suusube ben tun yiaynoo nge,  
Rondiibe gondi ka heewi kunnaaje.

E den balde kawle riiwaa, mehaa,  
Hoynede, yawiteede, yenneede.  
Wullaa, dusaa,  
Nibe heewude fureeji janaabe,  
Nibe heewude fureeji bibbe worbe,  
Nibe heewude fureeji faybe e berraabe.

Ebba den jalde malaade no buttunoo,  
Tawa soori ka yoobii pinka noloytotonoo;  
No dabba lamitorde ka condi looloo,  
Nde laaminoobe no jiiba kaydiji,  
Nde mbatulaabe no dabba giiteeli.  
No yaha, no ara, jolda, yawra,  
Uumaali, ottaali, yottaaka, yennaaka.

Kaawe wawtitaare e mujal !  
Kaawee deeyere e dewal !  
Kaawe needi e laral !  
Ndii leydi andiraandi hubbugol,  
Ndii leydi maniraandi dartagol.

Be faami nde laawii,  
Mujal jeydaaka e kulol,  
Needi wadiraaka diwnol,  
On newnanaama.... !  
Kongudi ardi wa uyindi.

Kono ngorgu fooli hulii,  
Jeere immii, darii,  
Dowti kullii njanii,  
Sowto kisiyee nanii  
Ardi e malii e dadii !

Oktoobur 1990

# Tama'u

Yiu mi fajiri no feera,  
Yiu mi bimbi no weeta,  
Yiu mi cuddi ka bugitaa,  
Yiu mi niwre ka hawkaa,  
Yiu mi jaale no wiira.

Nanu mi donto no jogga,  
Nanu mi hito ngo urkaa,  
Nanu mi haala ka haadaa,  
Nanu mi sondu no wuuda,  
Nanu mi liite ka wuttaa.

Taw mi yaasi no hentoo,  
Taw mi naange no funtoo,  
Taw mi duule no muutoo,  
Taw mi gondi no yooloo.

Sergitu mi gimdi di wullaa,  
Sergitu mi sowto ngo jaadaa,  
Sergitu mi taali di woowaa,  
Sergitu mi moose de weebsaa.

Amu mi tuuru ka accaa,  
Amu mi kelle ka moobaa,  
Amu mi ndimu ka hettaa,  
Amu mi joloko ka booraa.

Nanu mi salli no uujooy,  
Nanu mi jeere nde sooyo,  
Nanu mi kulle no woytoo,  
Nanu mi colli no cooroo.

Hedii mi gardi no waacoo,  
Hedii mi lambe no soondoo,  
Hedii mi faybe no siiboo,  
Hedii mi mbatula no ooloo,  
Hedii mi yukku no dukitoo.

Wewlu mi golle ka fuddaa,  
Wewlu mi dupe ka hubbaa,  
Wewlu mi ledde kafuufaa,  
Wewlu mi mbayla ka ~~sinc~~caa  
Wewlu mi foda ka moobaa.

Wullu mi yiye ka hibbaa,  
Wullu mi jande ka hawkaa,  
Wullu mi kulle ka hiidaa,  
Wullu mi yimbe ka hurgaa.

Heynii mi tama'u ka jiibaa,  
Heynii mi yimbe ka habbaa,  
Heynii mi gondi ka baayaa,  
Heynii mi yimbe ka wengaa.

Hoydu mu leydi no dimbaa,  
Hoydu mi aduna no waylaa,  
Hoydu mi gande ka rendaa,  
Hoydu mi jande ka townaa,  
Hoydu mi needi ka woondaa,  
Hoydu mi yimbe be wullaa,  
Hoydu mi faybe be yurmaa,  
Hoydu mi rewbe be aanaa,  
Hoydu mi mawbe be ninsaa.

Ger mi jowli din hu6baa,  
Ger mi hurgo ngon lancaa,  
Ger mi ngayngungunriiwa,  
Ger mi bombe ben jaawaa,  
Torii mi Alla mo dullaa !

1984

# Angola

Ko onon yo bïbïe Afrik hedee,  
Mido yewta on, andon ko feyyata Angola.  
Sabu hande-hande portoobe ben,  
Janfaaji mabbe no laabi poy fii Angola.  
Maa anditen ado janfa kan fooloyde en,  
Hettaare men gasataa si yejjita Angola.  
Neebii ko duubi teemedde nay  
Gila Portigee cippii e leydi ndi Angola.  
Bee sibbe men njagga bagaa,  
Jattaa wara e leydi mabbe ndi Angola.  
Dee jawle mabbe de lannataa  
Wattaa halal bee portigeebe ton Angola.  
Haa jande goo, e ko waajibi,  
Bee sibbe men dartii darii fii Angola.  
Bee cippiraa, bee cippiraa,  
Haa portigee tawi luttataa fes Angola.  
Yo Alla yaafö bee bïbïe maybe  
Fii endepandan leydi Afrik Angola,  
On sunna mabbe no wonti jowli,  
Cippirooji e leydi mawndi ndi Angola.  
MPLA woni fedde goonga  
Findinde yimbe no porto yaltira Angola.  
Kono fewndo doo portoobe ben  
No jokki warugol sibbe men ben Angola.  
Hibe habbitii oo endepandan  
Laatataako e leydi cuucal Angola.  
Hibe hirsä rewbe e bïbïe mun,  
Bee naada condì hubba giitii Angola.  
Hibe habbitii dee jawle duudude,  
Be accataa den huutoree fii Angola.

Afrik di Siid ndii leydi njaggu hino haffitii  
Hettaare gasataa e leydi mawndi ndi Angola.  
Holden Sawimbi taafsen be yimbe hino anniyii  
Yeeyay jamaa ndii leydi Afrik Angola.  
Haa guutu wutta nguu njaggu porto gasataa  
Ko goonga e leydi Afrik Angola.  
Immee musibbe ko saai on,  
Daroden no wallira leydi Afrik Angola.

1976

# E nder nibe Gine

Naange nangii mutal,  
Jemma jombii datal,  
Dorre noolii jahal,  
Koydi konkii aral,  
Werde wernii kulol.

Janne naayii jali,  
Jinna jikirii fibi,  
Kulle kirdaa gabii,  
Su'unji sortii darii,  
Bombe buumii homii,  
Coora corte ari.

Baafe bootaa libaa,  
Jawle jattaa jabaa,  
Rewbe reppaa ronaa,  
Bibbe bittaa bilaa,  
Gorko gaajaa guyaa,  
Neddo nangaa nabaa.

Ande aanaa ka fawre,  
Gondi gooyaa e ladde,  
Neddo neiraado gande,  
Wonti woyiroowo muuse,  
Moyyo maniraado dambe,  
Yalti yilmirdo temme.

Joloko jogitii ka jungo,  
Boggi bannaa ka loopo,  
Wurso wengaa no wiwoo,  
Yimbe yamiraa yo welto,  
Moose moobaa e maydo !

Goonnga guuwaa to gayde,  
Worbe wariraa wa warbe,  
Mangu montaa e mawbe,  
Hoyre hibbaa e hobbe,  
Lorra liilaa e loube,  
Jawle jattaa ka jeybe.

Jande jiibaa jalaa,  
Wacco wuufaa wottaa,  
Nayla noddaa nelaa,  
Feeuwube finnaa feninaa,  
Sariya sunnaa surraa.

Hersa heewii laral,  
Immo ittaa jogal,  
Goonga gollay bural,  
Keldu keeraa munal,  
Hoolo hawkaa kulol,  
Alla addane gebal.

1984

# Bonkiji Bono

Bonooru weelano pande goo haa anniyii.

Mo ndu fotti wo hirsay mo jaama no haarira.

Nduu seppi nangi datal buruure e aynugol

Feyyoobe nanga be,yurmataake,ndu accataa.

Nder hen no wulla e baayo gondi e woytagol,

Paykoy tatoy funehoy dajiande a sikkataa.

Bonooru landii humpitii ko be wullata,

Tawi jiido maabbe no kondi waali waawataa.

Ndu inni don hindu waawi pawndude neene bee,

Yo be ittu nagge e ciikuliiri ka tardataa.

Bay mbaayo bono lannii nafaade ko addanaa,

Nduu inni bee yo be yahu kisan e be hewtita.

Hewtoyde maabbe, bonooru wiibe ndu firtataa,

Yo be luitu baawo ka suudu maabbe be naatataa.

Yo be joodo don nde be nani jaraw,

Yo be jaabo tun "aamiina -miina" be ninsataa.

Jaa yaw-jaraw ko mayde jiido no yurmiri,

Bonooru bondu no namde jiido mo waawataa.

Nduu lanni tun kin bonki mayru ndu pargiti,

Laawii e ladde ka ndu suudotoo en mijataa.

Sari humpitii ari woondi don yottanto koy,

Gera wakkiloo no ndu nangiree hara wattataa.

Sari dabbi boggi e saaku mawdo e ciikulal,

Hammiri ka ladde e nder kejal bono andataa.

Sari bayra hewtii salminii haa neebitii,

Bono deyyinii yurnori ka jolkun ontataa.

Sari tappi ciku mun maatini hino bokkitoo,

Bono yalti ndaari hino angisii ciku wattataa.

Bono inni naatu an siddo moyyo en yewtiday,

Ndaaraa tawaa a teddinaama a ninsataa.

Bee hirsi ciikuli hubbi giitii fillayee,  
Bono mbelyinii hino metta kolli hay hersataa.  
Sari inni bono, yahu udditaa oo saaku daa,  
Nder ton no landsan addanaa mi ka tongataa.  
Bono yawni teppere udditoyi ngil saakuwil,  
Tawi nando maggii duudataa maa weebataa.  
Yaawi sut sari habbi saaku ko yoyre tun,  
Bono lutti ton hendaa nabaa ka ndu artataa.  
Fune focci nduu haa yaari lakkere wii bono,  
Hino woodi don tebbeeli weldi si ndu jaamataa.  
Bono memminii hino ɳuyla don haa wowli woo :  
Hindu waawi dey feyyinde seeda ka duudataa.  
Bee burti foccude jabbitoo haa neebiti,  
Be banni teewu, bono deyyi lew sabuwuurataa.  
Oo fillayee do andinii wano wujjugol maa hunyugol  
Mooyaa no rewta e waddo dun ka o sikkataa.

7 Febraari 1976

# Nande tati Ibriilu

## 1984

Jalaande mawnde nde majjataa,  
Nden jande mawba mban wallinnaa,  
Nden jande njaggu ngu a sikkataa,  
Bugitaa to gayde ngu artataa,  
Hoolorbe doole be haabataa,  
Innaa yo martu be pottinaa,  
Hoolorbe haala be ronkataa,  
Hollaa haqiiqa be mijataa,  
Jattoobe rewbe be tuubataa,  
Tayanaa datal hara yawtataa,  
Jattoobe jawle be juulataa,  
Follaa ka laamu be hoydataa,  
Hiidaabe warbe be gomdinaa,  
Piitii ka mballa be findinaa,  
Yurmeende mawnde wadii ka men,  
Neddsanke jiibaa tampinaa,  
Warugol daginaa fii laamagol,  
Hurgaabe lettaa aybinaa,  
Wullaandu sowti e ngal laral,  
Sokholaaji heewi haa hakkinaa.  
Non ! fedde riiwaa e nder kejal,  
Dee jagge mayre, den jaggita,  
Halfaab be dun fow waynitaa,  
Nangaabe toopaa accitaa,  
Lettirde Buwaaro udditaa,  
Adunaaru yaldi ka weebitaa,  
Alaaji warbe be ronkataa,  
Dee kulle hurmudse fuuyinnaa,  
Din cuudi mayde di jalbataa,  
Hentori wa yaasi mo bawlataa.

Wullen dusen fii no yaaforen,  
Hara yejjitaali ko feyyi Gine,  
Hormordse darnen maandinen,  
Saajji njaggu ka men Gine,  
Laamuujji halden fewjoden,  
Hara doole gasataa ka men Gine,  
Haqqeeji neddo dun teddinee,  
Sariyaaji darnee fii Gine,  
Diisaade arta ka naamu men,  
Njagguujji acca ka men Gine,  
Oo haldi -fotti dun keldinee,  
Hettaare juuba ka men Gine,  
Daabooobe jokka fii haaju mun,  
Hara huunde fallaa ka men Gine,  
Jangoobe janga be luggina,  
Ndee jande tiida ka men Gine,  
Dee gande taskee mawninee,  
Antaaku beydee ka men Gine,  
Immiibe darii ko yo wakkilo,  
No buttu wadira ka men Gine,  
Wata gooto dulbu ndii leydi men,  
Ndii leydi labaandi ka men Gine,  
Wata wattu wargol njaggugol,  
Wano warri hanki ka men Gine,  
Ibriilu tati en maandike,  
Nden jande jalbu ka men Gine,  
Allaahu lando on wallitii,  
Daditiibe suusi ka men Gine.

# Cukaaku an

Mi fini, mi dankoraa giggol,  
Mi wulli, mi dayniraa yimugol,  
Mi weelaa, mi faaboraa hoyegol,  
Mi muusaa, mi pawndiraa mowlegol,  
Mi monii, mi rippiraa jeejegol,  
Mi bonni, mi fewniraa yiltegol.

Mi humpaa, mi holliaraa ne'egol,  
Mi landii, mi jaaboraa henagol,  
Mi piyaa, mi andinnaa hulugol,  
Mi feni, mi fewniraa hadegol,  
Mi fijinaa, mi ittanaa sawtegol,  
Mi taalanaa, mi faminaa yoyugol.

Mi tobbaanaa, mi wadanaa teddungal,  
Mi uujinaa, mi hendinnaa alluwal,  
Mi duanaa, mi halfinnaa musidal,  
Mi jaaranaa, mi hollitaa toolodal,  
Mi dowitzaa, mi nawraa dudal,  
Mi woondinnaa, mi hollaas datal,  
Mi sigiranaa, mi newnanaa findital,  
Mi teddinnaa, mi bornaa bilawal.

Mi fuddinnaa winden masen,  
Mi yoobinnaa ndarten dursen,  
Mi andinnaa remiden sanken,  
Mi accitaa cellen belen,  
Mi tindinnaa gollen foolen,  
Mi ekkitaa reenen ormen,  
Mi imminaa habben howen,  
Mi accanaa soppen feccen.

Mi tumbitii nder ngal giral,  
Mi andiraa cuucal nundal,  
Mi findinaa yisugol laral,  
Mi hooloraan dokkal ballal,  
Mi maniraa diwugol dogugol,  
Mi andiraa neepal antal,  
Mi diisodaa fii ngol gorol.

Mi wowtinii rewugol laabal,  
Mi sattinii yoogol baagol,  
Mi weltorii yahugol nelal,  
Mi ekkitii yiilugol ndamaruwal,  
Mi eltiti pirci e waajugol,  
Mi hubindii yubbugol junnitol,  
Mi wawtii doftagol munpa... gol.

Mi nabidaa halden fotten,  
Mi habidaa wujjen jatten,  
Mi gerdaa fewnen fenen,  
Mi tawdaa nunden nafen,  
Mi hollaa gollen heben,  
Mi keeranaa puyden fijen,  
Mi hollaa ebbēn eten,  
Mi wowtinaa juulen rewen.

1975

# Ande

Hoydu mi jemmaare,  
Mido daja jiibaare,  
Finu mi bimbiire,  
Hebu mi maapaare,  
Yahu mi ndaaroore,  
Yiu mi sadakaare,  
Fibu mi hoolaare.

Dogir mi ka golle goddaade,  
Hulu mi ndarde hooreebe,  
Yiu mi faale hiidaabe,  
Hebu mi kaydi waynaabe,  
Fesu mi gondi hawkaabe.

Wangii mi e date dabbaydo,  
Wangii mi wango meeyado,  
Fadu mi gebe barkindo,  
Hebu mi sokhola tilfaydo,  
Ar mi suudu aanaydo.

Sonnaajo yalti artaali,  
Bee faybe wulli naamaali,  
Jom suudu soki habbaaki,  
Bee yibbe hucci landaaki,  
Malal yalti waynaaki.

Kirle e lanjooji,  
Nebbe e haajuuji,  
Koltu e jaabooji,  
Faaro e yaaduuji,  
Acci ka yangiji.

Wadu mi luttudi ka sasa,  
Yahu mi ka mawdo Saara,  
Yaw mi laamel mi meppaa,  
Yaw mi aljanna mi juulaa,  
Dapu mi welo-welo mi hoydaa.

Yantu mi e miijo,  
Wuttu mi faabo,  
Dabbu mi mardo,  
Nangu mi jeejo,  
Fadu mi ballo,  
Hebu mi gajo.

Mi wangii e date maapunde,  
Monee jogii mi e bernde,  
Hubbu mi yiite e yiiloonde,  
Nde naforin mi e yawtirde,  
Nde uddin mi yeewirde.

Yangi wonanin mi junjurran,  
Leydi sortii ley koyde an,  
Wengilii mi e mandilan,  
Kumu mi, yanu mi janjaran,  
Nanu mi Alla no noddla lan.

O wii yiltor ka iwrudaa,  
Yetta mi jabaa rewaa,  
Wakkilaare ko kaafa ka mettataa,  
Huuru nanaa a ninsataa,  
Dajnaa polge de huubataa.

# Koolima

Nanii jurnde hino jartoo,  
Andaa Sunsure jom labegol,  
Ndaaraa die hino baayoo,  
Hedodaa don ngol sowtol.  
Pottaa jonde e cate daago,  
E hino Dojoraa ngol caangol !  
Dabbii hoddu fii kewto,  
Mowlaa piindi sera maggol.  
Mettaa buttu ngil pitawil,  
Nangaa koydi ka tawi mijo.  
Meppaa laare ka sowi delbol,  
Ornaa ndarde e ngoo fello,  
Limaa pete de naa daragol,  
Foofaa hendu hindu moomoo  
Wewlaa mandilo ngil yariwil.  
Ardaa bimbi fii yeewo,  
Ijaldaa tawde ngil curkiwil,  
Aynaa don ngon waado,  
Fadoda hen ngal naangal.  
Turanii ndargol ngoo wimbo,  
Yamaa leggal sabu giilol.  
Fewtaa nano ado jaamo,  
Nawraa gite sengo mutal,  
Yiaa Labe e nder bantal,  
Weltoraan wonde taakanjo,  
Felaa Seerimaa nawlirng.  
Aa Labe jom labegol !  
Darande Fuuta ka tumbo !  
Yiilu non sengo mutal,  
Yiaa Kolla wela luumo,  
Yiaa Aynde leydi demal  
Yiaa Dojol ka ley fello,  
Yiaa kaaweeji ci misal.

Immii seeda ka sera weeyo,  
Joldaa ley tawaa laawol,  
Rewraa Burnete ngon hodo,  
Weeraa don yeru nallal,  
Yahaa Kubi tawaa baaro,  
E nduu hendi jom newagol.  
Yettaa don jeydo malo,  
Kaawee bawde jom luttal !

Septaambur 1993

# Jiibu-jaabu

Jibinaa boobo o foltoo,  
Jannaa faybe be dartoo,  
Yettaa rewbe be aaloo,  
Diisodaa mawbe be duuroo,  
Fewtaa goonga o suudoo,  
Wowlaa moyyi be biisoo,  
Nangaa gujjo o laawoo,  
Hollaa geddi be hooloo.

Addaa sariya o hawkee,  
Yewtaa goonga be kirdee,  
Fuufaa ledde de sunnee,  
Hurgaa bundu ndu jiibee,  
Moobaa nooge di lancee,  
Fontaa waado ngo ombee,  
Dabbaa dowdi ndi ittee.

Townaa hoore nde honkee,  
Nangaa golle de riiwee,  
Jangaa gande de hoynee,  
Townaa defte de yaabee,  
Hubbaa jowli di hippee,  
Addaa gando o wookee,  
Uddaa jolde de wattee.

Waccaa goddo o woytoo,  
Ndaaraa niwre nde hentoo,  
Firtaa kabbi di habbo,  
Tippaa leydi ndi eesoo,  
Waajaa mawba mba wayloo,  
Fewnaa lekki ki liyoo,  
Nangaa Alla o weltoo !

1993

# Baagol

Fokkiten kileeji din  
Jiiri kaaba lannataa,  
Jaabereeje den wuli.  
Fokkiten kileeji din,  
Naama haara woopataa,  
Kocce welse tultataa,  
Curba piindi nakkataa,  
Worto kimpa yooboden,  
Bernde golle immoren.

Fokkiten kileeji din,  
Hay e gooto luttataa,  
Senditen kalaaje den,  
Jimbe laala addoren,  
Kelle rewbe jaayoden.

Fokkiten kileeji din,  
Fojne yawko kon yoyi,  
Cawti maaro nodda en,  
Jombo kaaba wacca en.

Fokkiten kileeji din,  
Basaga nende hebbinen,  
Beembe dagge hakkinen,  
Jakka toore senditen,  
Welnanen jamaaji din,  
Heenge arnge acca en.

Fokkiten kileeji din,  
Lanjariiji fewndike,  
Jeere leele nodditi,  
Yaadu weero udditi.

Fokkiten kileeji din,  
Luumo dabbu udditi,  
Lambu wawbe hewtiti,  
Memminee balanji din,  
Wakkilaare men nafay !

1994

# Fernan Kerepii

Accee mi wulla nattede,  
On porto yondo hooleede,  
Newnee mi wayda waynaade,  
On gorko iwdo nano leyde.  
Yurmee mi dusa surreede,  
On kooho yiddo waawaabe,  
Ndaaree ko hebu mi handeere,  
Nden mayde nafudo ndee jeere.

An jabudo golle yobitaaka,  
An yidudo faybe landaaka,  
An lonto neene woodaaka,  
An luujo baaba wondaaka,  
An rewudo Alla yeddaaka,  
Yaa Alla yobitire kuude maada.

Dariiji Labe di roccataa,  
Mbeddaaji saare di woopataa,  
Cuureele laamu de lannataa,  
Jeniraade neene de miwdataa,  
Fijitirde faybe de andudaa,  
Immorde laade ka ardataa,  
Lumbirde candi fii naatugol,  
Werdeeji hobbe fii jabbagol,

Findinde yimbe ka besitagol,  
Andinde yimbe ka darnugol,  
Eltirde faybe ngol ayyugol,  
Waajaade sewbe fii wondigal,  
Dun fow o wallir ngal ca'al.

On yiddo yimbe gollooobe,  
Etoden e kuude hawtaade,  
Rewugol e sarti di o holli,  
Sanken e coppi di o acci,  
Fotten ka jowli di o hubbi,  
Ndaaren no jande bee faybe,  
Keldirta okka en bawde,  
Darnirde saare malnaabe.

Juuroden on diuuda mbawdi,  
Maandinen den kuude suufi,  
Ewnoden den golle moyye,  
Holliten den polge yonde,  
Ndayginen mo e niwre mayde,  
Andinen ko en sella finde.

1994

# Boobo

Nde boobo yaltiti, yeeso fow hentoo,  
Ko nibbitunoo jalba sal poodoo,  
Sokhlunoodo jala moosa weltoo,  
Wayta tun wa si fus hitaa yeeso oo daydo.  
Ndaarii ko faandanii laatagol neddo,  
Hara jande goo a wiataa e hino boobo.  
Hay mo tampu sonjii si hebu biddo,  
O yejjitay dun fow o bura mardo,  
O wia sugu ngal kebal makko alaa nando.  
Nde himo feyya juude duudude fontoo,  
Mo bee habbitoo bakay mo e bernde mun do.  
E nder suudu ndun ka woni woo koo lando,  
Enee alaa ko foti hewtitii yari boobo,  
Sabu ko kanko lontotoo nde woni jango.  
Mo accaa singel tun woni maydo,  
Luttudo kapun poomaa ko o wurdo,  
Enee mo no yiddan maa on don ko gido hoolo!  
Boobo ko piindi, ko lekki, ko lonto.

Maarasi 1973

# Mandela

Heditee mi yewta fii Mandela,  
Nunnee mi jaara fii Azaniya,  
Afrik di Siid mo Mandela,  
Okkado cuuco fii Azaniya.

Mandela ! yaa Mandela !  
Nelson yidaado mo ronkataa,  
Nelson nanaajo mo siccataa,  
Nelson dariido ko Mandela,  
Cippirdo duubi fii Azaniya,  
Yarliido wonkii ko Mandela.

Ndar Soweto ! ndar shaperwil !  
Wonkiiji saami fii Afrika,  
Wullandu sowtii Azaniya,  
Giiteeli hubbii Azaniya,  
Hurgaabe woondii Azaniya,  
Hidaabe hunyii Azaniya.

Mandela ! yaa Mandela !  
Toonaado jaawa tampinaa,  
Jlaawaado bonnaa jukkinaa,  
Hurgaado hawkaa koyfitaa,  
Dartiido lettaa mo haabataa.

Mandela !hey Mandela !  
No Roben suriire nde hawkegol,  
Roben kasooji di lampebol,  
Roben darorde nde suusugol,  
Roben hadaali be dartagol,  
Roben hadaali be muijagol,  
Roben ittaali be e immagol.

Mandela ! yoo Mandela !  
Ndayguuli foolay nibe den,  
Ngee naange nattay duule den,  
Nguu ngorgu foolay bombe ben,  
Allaahu newna non polgeden.

1990

# Wuldaa mi

Wuldaa mi dayyere Funnange nano ka boror mi,  
Eggudu e wango ko heli leyde,  
Batte teppe e hormorde maamaabe,  
Jeere nde nai e deftere nde jiccaaki,  
Guuwe gai e dammi ka ooirde,  
Ngaynaako mo libiti e weduru mun ka wurooji,  
Koode ko dowi arbe e dee pelle,  
Jeeri ka cippini ndarde no luggina mijo,  
Tuppe de fottideede ka hollaande.

Wuldaa mi Pelle,	Wuldaa mi Ruuruba,
Wuldaa mi lombi,	Wuldaa mi Wayyu,
Wuldaa mi cehe,	Wuldaa mi Nassu,
Wuldaa mi kolla,	Wuldaa mi Deeto,
Wuldaa mi ladde,	Wuldaa mi Jawbe,
Wuldaa mi wulaa,	Wuldaa mi Fuutuubé,
Wuldaa mi juuwo,	Wuldaa mi kawte,
Wuldaa mi huuho.	Wuldaa mi yibbe.

Wuldaa mi pati e taali mun ka jemmaaje,  
Hawtideede nafaqqaari ka beynguure,  
Bira e kocce mun ka ndappaaje,  
Ndaaga putee e kajaa nde wiaa yaadu,  
Kettungol e nebban nai ka wulde latu,  
Ndaaga pute e kajaa nde wiaa yaadu.

Wuldaa mi gori curba ka yellii kore no iwa  
[bundu],  
Reppaawel e moose mun wa huurul aynu,  
Sonna mo jubaade e lambiri e jawe de coggu.

Wuldaa mi mbarin mo mbaru fidi mawnaali,  
Goree mo yaadu nabi o artaali,  
Mijan mo kondere libi o wowlaali.

Wuldaa mi farba ka radii jaande nde jeejaaka,  
Wondeede e jalideede ka yakkataa,  
Jokkere endanji di lannataa,  
Cukaaku ndi mbawdi ka hattataa.

Wuldaa mi bara bibbe worbe ka lambuuji,  
Piyo magi e wallinde pirci,  
Candi e diide mun ka fubbii mi,  
Baaro e sankugol nde wiaa settii,  
Lampura ka geseele e yawo gabi.

Wuldaa mi kileeji golle ka kawtital,  
Kirle e kubito ka leelewali,  
Worto e labe nde woni baagol.

Wuldaa mi cuudi di tente ka donji,  
Para e dunki e biliti pitaaji  
Foppe e maarooji ka bendii,  
Cawti kaaba e jombo ka cuntuuji,  
Boowe e kollaase ka foccii,  
Urngol piindi e leydi wuurundi ko harmin mi.

Wuldaa mi foolooji ayyube ka fijitirde,  
Waapo ka ladde e guriije.  
Wuldaa mi tiwe colli wuudooji ka giirata,  
Cente gooki e kero ka ndugginta.  
Wuldaa mi kaynal e keneeli ka hoore seere,  
Luumo dabbunde ka nende kese,  
Jurde e bulli ka-die laabude.  
Wuldaa mi gimci di oya yubbi o jannaaka,  
Tindi di oya okki o jeejaaka.

Wuldaa mi hoddu e galli mun di bontataa,  
Kewtoobe ka laggii daande a hoydataa,  
Serdu ndu hito yurmungo ka pordataa,  
Maaginoobe ka Katilongo moosi no o andiraa.

Wuldaa mi duse e beytooje ka gomdinbe,  
Salli ka saylinta ka subakaaje,  
Jangande ka bolonru toraade jom bawde,  
Jalde nde bombe lintetaake ka rimbe.

Wuldaa mi neene e baaba 6e woodaaka.  
Wuldaa mi kandi jiido ndi neiraa mi.  
Wuldaa mi Fuuta Jaloo ka jibinaa mi.  
Wuldaa mi leydi Gine ka jeyiraa mi.

1993

# Immoden

Anditen ardiibe en,  
Yoogen e boyli di beeabataa.  
Horminen fii mawbe men,  
Waajuuji mabbe di daynataa.  
Mawninen neeminbe en,  
Neemaaji haqqil di miwdataa.  
Juuroden waliyaabe men,  
Silminbe leydi ka bortataa.  
Tiidinen fii diina kan,  
Fewten e Alla mo toonataa.  
Maandinen taarikh Afrik,  
E polge mun den roccataa.  
Imminen dee gande men,  
Cadoden e majje de majjataa.  
Teddinen fii dende men,  
Faamen ko sarti ka bantagol.  
Banniten bee yoyube men,  
Wata mayde dalu en ngal maral.  
Hittinen neepaaku ngun,  
Townen yedaabe sugu ngal gebal.  
Nafitoren naamuuji men,  
Suuten e muudun beydagol.  
Lugginen haqqil e mijo,  
Sincen ko mawni e ngal laral.  
Keldinen golleeji din,  
Hawken salaare ka huuwugol.  
Dolnoren ngol pinnugol,  
Hawken kiboore e haalawil.  
Nangiten remuruuji din,  
Ngaynaaku mbayla ko hubindagol.  
Reenoden ngol sunnugol,  
Hundaari ledde ka wuuruden.

Labbinen nokkuuje men,  
Wata jooge addu ka nawneten.  
Beydoren nder golle men,  
Dee gande porto ko wawri en.  
Janginen bee faybe men,  
Jandeeji fow nafa leydi men.

Hussiten hen fow dude,  
Antande golle e faamugol.  
Diisoden bee rewbe men,  
Ben tindiraabe ka jaggugol.  
Naafiqaku e hulde goonga,  
Ittee e jikku ngal kawtital.  
Doftoden sariyaaji din,  
Sabu baawo mun gasataa kisal.  
Joddinen oo haldi fotti,  
Fii ardagol wona fewjodal.  
Harminen ngaynguuji din,  
Fii leyyi-leyyi riiwee datal.  
Yidsindiren danden daden,  
Haqqeeji neddo heba teddungal.  
Hawtiten fii Afrika,  
Dee leyde men jaBa fottugol.  
Immoden fii Afrika,  
Danden ndimu hetten malal.

Diisaambur 1994

# An tun e Alla

Ndar jnande goo hino sabbi maa,  
Tono golle de gollircsaa halal.  
Yurmeende no heewi e oo aduna,  
Sabu majjude yimbe e kuude dewal.  
Hibe jiibude yejjita laakhira,  
Nde wiaa naawoore nde jooma bural.  
Hara luujo alaa ko wallito maa,  
An tun rondiido nga'al dongal.  
An tun e bonki ki huuwudaa,  
Ka adunaaru miile ndu mbeldugol.  
An tun e moyyude kuude maa,  
A hawtaa e goddo ngol rindugol.  
An tun e geddi di wowludaa,  
Mantaade fenude e janfagol.  
An tun e derfude fii dewal,  
Hida hatti jeyde ko nennidaa.  
An tun nde nawna on hundu maa,  
Heyataa no wallire tampugol.  
An tun ka muuse ka ngirbugol,  
Tuma mayde konki nde woopataa.  
An tun e niwre ka surregol,  
Foccii e mballa ka belnadaa.  
An tun nde ruuhu on yentinaa,  
Sabbaade non nguu palgu daral.  
An tun e loope de wontataa,  
Sabu gildi namdi ngil foronwil.  
An tun nde majji e qaburu maa,  
Kala maande bandu ngil adunawil.  
An tun e Alla mo toopataa,  
Lubunoodo wonkii wuurrugol.  
An tun nde hewti ngol mandikugol,  
Hara feere alaa dun tultataa.

An tun ka njoddi ndi yobitadaa,  
Fii kuude maada ado ngal lajal.  
An tun ka lepte nde hewtu maa,  
Woodaa no wallire hoynugol.  
An tun ka yiite si no fewtu maa,  
Heyataa no ittire roytugol.  
An tun ka fewtude tagudo ma,  
Allaahu lando ko jom kisal.

---

Hay fus ko selni wajiboore alaa,  
Si wonaa Allaahu mo hoddigol.  
Woni burnitaare maa mantagol,  
Dun fow ko majjere mo faamataa.  
Kala townitiido townaali Alla,  
Heboyay nde laawii ninsugol.

---

Heditii gimol adunaaru Alla,  
Ndaaraa tageefo kaaweeji mu'un.  
Kammuuli koode e weeyo mu'un,  
Dun fow no dilla hara woopataa.  
Dun fow no rewri hara jaasataa,  
E66oode mun hara nakkataa.  
Ndaarii tagaado ado kondugol,  
Tere fow no yaadi ka pordataa.  
Tenjin heneere ka yerindiraa,  
Kala huunde heyconde e ngal laral.  
Oo jemma palorma de lontondiral,  
Dun don ko sariya a ittataa.  
Sifa huunde fow no e nder limugal,  
Kala mun no etaa hino ebbanaa.  
Adunaaru ko gabbe de hattataa,  
Yuboodi den no e nder ngootel.

Woni kulle ledde maa yimbe gaa,  
Fii layude mun maa ngel ngootel.  
Ngootel ko pufal ko ka immoraa,  
Seedee ko gooto woni Jom goodal.  
Nooneeji ko woodi no hawti yiyal,  
Pottal adunaaru sikke alaa.  
Limugal neddanke ko jembinol,  
Kuugal on gooto mo faljataa.  
Pellet on gooto mo nando alaa,  
Dajaali dajaaka ko Jom tabital.  
Ko o Jom goodal, o sifori genal,  
Kadi bawde makko den battataa.  
Alaa ko badii mo e kala banjal,  
Ko o yonudo e timmudo haa abadaa.  
Wata neddo nandu e bubbawal,  
Yiataa nanataa kadi ebbataa.  
Yo o yeewu o yeewita yiltindira,  
Laawol o hebay fii gomdinol.  
Sabu Joomi no werti e ngal laral,  
Goongaaji di ndaygu ngu miwdataa.  
Maandaade jittude ebbindira,  
Den bawde fow no ka miijagol.  
Miccaaku ko andude hoore maa,  
Andaa sabuuji di yubbondiral.  
Kala huunde tagaande nde andudaa,  
Woniray pufal, waasira mutal.  
Loopal ko huunde nde tagiradaa,  
Wontaa to qaburu sugu ngal loopal.  
Fuddaade e timmude luutondiraa,  
Dun fow ko e bawde Jom tagugol.  
Wayloo seydoor oo adduniyaa,  
Ko no o yellora hewta Jom senagol.  
Taariika ko laawol yellitagol,  
Jamaaji di yaadu ndu huccataa.

Kaawee tageefo ngo hattataa !  
Kala huunde no andini en dalil.  
Jibineede boobo maa jiidagol,  
Kala huunde wadunde maa wadudo on.  
Dapugol kala huunde no sab'inaa,  
Ko wa nii fii me'en yedaabe bural.  
Hay fus ko woodi woodaali meere,  
Pellet ko bawgal Jooma genal.  
Ngol rewrugol adunaaru maa,  
Waawaa ka wona kuugal mehal.  
Meerente ko bundo mo faamataa,  
Njubboodi ko seedee ngol tagugol.  
Neddanke no dabb'a ka nakkataa,  
Ngurndan Giggol e nga'al andal.  
Jamanuuji muli din lannataa,  
Hidi dabb'a ko huubi wonaa bittol.  
Yangiji hadaali di dabbugol,  
Din piiji tati ka di timmina.  
Yiitere woodaa e baawo ko yia,  
(e) cenkun le alaa si alaa kuubal.  
Kuubal hino huubi kala ko wiaa,  
Ko Seniido jogii sugu ngal sifal.  
Ngurndan adunaaru ko dabbude ngal,  
Ngal don le ko dewal ngal udditanaa.  
Timmode kuubal ko laakhira,  
Yaa Alla ! yurme rokkaa gebal.  
Yaa Alla ! seeku e bawde maa,  
Jlinnaa ka hatti ngal hatojinal.  
Yaa Alla ! wertu ka saare malal,  
Neemaaji weldi di lannataa.  
Yaa Alla ! laatin fodaari maa,  
Nden pande jango ka kawtital.

Moftal Allaahu ngal seedataa,  
Kala sendudo dadataa donkinegol.  
Giggol wondaabe ko sarti dewal,  
Kuubal badotaako si finde alaa.  
Giggol neddanke ko kurkanagol,  
Laabana bee julbe be hawtidudaa.  
Duumaade e diina dun hadataa,  
Ruttaa beya julbe seeda (e) gebal.  
Dahboowo malal on aamataa,  
Dalitaade mbeleede adunawal.  
Siwraybe jipa maa mandila,  
Karahan niibirta e kuude dewal.  
Artir reenaare e wawtitagol,  
Dun wallete aduna e laakhira.  
Dalitaade, wanaa yo a joodo filaa,  
An juldo a wuuray jawdi halal.  
Yangaade e wuurdude lakkere maa,  
Sembinte dewal kadi jalgine tal.  
Laabal wonataa si a huuwataa,  
Awa fellitu golle ko tottitagol.  
Wata rowtiro e Joomi mo toonataa,  
Dee kuude de huuwirdaa jeyal.  
Kala neddo hewtudo kellifuyaa,  
Farlaa ma ko huuwi adaade lajal.

Yaa Alla ko huubudo e moyyere mun,  
O yeday tuuboobe o okka kisal.  
Allahu ko Fonnudo o burnintaa,  
Si wanaa burindirbe e kuude dewal.  
Windaneede wanaa ko lamitoraa,  
Ko yo a fellitu Alla ko jom bawgal.  
Sala maada ko huunde nde halfindaa,  
Si a wakkili a hettay tonedaragol.  
Tuuben dun sellina kellifuyaa,  
Hejoden huutorde adaade lajal.

Yaa Alla ko huubudo e moyyere mun,  
O yedsay tuuboobee o okka kisal.  
Wuuree maayee hay gooto dadaa,  
Alanaa hay gooto yeditaade bural.  
Hadataa yidaa kadi teddinaa,  
Shaykuube jogiibe faamu datal.  
Moftal Allaahu gidaale alaa,  
Haqqee neddanke fotaa libugol.  
Bee lambe yo laamor fewjodal,  
Bay laamu be halfina heddortaa.  
Diisaade ko dun woni wondigal,  
Kala juldo fehnay njaggataa.

Wano gande halorde ko jiibitogol,  
Si a sendu ko baraaaji windanadaa.  
Neddanke ko yedaado weebitanaa,  
Neemaaji keyeeji di dakminugol.  
Allaahu no okkori en neejal,  
Hubindaade gundooji adduniyaa.  
Si a majju a majjan hoore maa,  
Allaahu no newnani en andal.  
Bee sikkube rewso o luggintaa,  
Ko fadube e majjube fii dewal.  
Rewugol timmaa si faamu alaa,  
Sowugol, gelee, ko hattirde malal.  
Adunaaru ko defte udditanaa,  
Kala himmudo andude Jom goodal.  
Andal no dagii ko ko farli maa,  
Hida newnanaa andirde dewal.  
Fii Alla no wona ko wirnitanaa,  
Yedaabe be andira felsitugol.

Hida andira Alla haqqilugol,  
Si a luggin miijo yellitiidaa  
Hida watta e dun don dabbitugol,  
Fii makko ka kuude ka battinaa.  
Dee date andal de liddondiraa,  
Hida jokkida dee fow duumanagol.  
Ardin ka jande nde dabbataa,  
Qur'aan ko hatti e teddungal.  
Qur'aan ko destere cippinanaa,  
Neddanke no o dadira hayrugol.  
Awa andu non kadi gomsinaa,  
Ndee jande ko waccude Jom senagol.  
On tagudo leydi e kammu ngun,  
Kadi okki en ngol ardagol.  
Yetten mo rewen mo o rutta en,  
Yaafeede bisude e kadi malal.  
Juulen e Nulaado Muhammadaa,  
Tefanoowo en tuma immutal.

1995

# **JNOGGANDE**

<b>Naarugal.....</b>	<b>2</b>
<b>Hunorde .....</b>	<b>3</b>
<b>Leydi Gine labaandi .....</b>	<b>6</b>
<b>Bookar Biro.....</b>	<b>9</b>
<b>Alfaa Yaaya e suufaafe mun ben .....</b>	<b>14</b>
<b>Almaami Saamori.....</b>	<b>17</b>
<b>Naange kawle .....</b>	<b>20</b>
<b>Tama'u .....</b>	<b>22</b>
<b>Angola .....</b>	<b>25</b>
<b>E nder nibe Gine.....</b>	<b>27</b>
<b>Bonkiiji bono .....</b>	<b>29</b>
<b>Jlande tati Iibriiu 1984 .....</b>	<b>31</b>
<b>Cukaaku an.....</b>	<b>33</b>
<b>Ande .....</b>	<b>35</b>
<b>Koolima .....</b>	<b>37</b>
<b>Jiibu -jaabu.....</b>	<b>39</b>
<b>Baagol.....</b>	<b>41</b>
<b>Fernan Kerepii.....</b>	<b>43</b>
<b>Boobo .....</b>	<b>45</b>
<b>Mandela .....</b>	<b>46</b>
<b>Wulsa mi.....</b>	<b>48</b>
<b>Immoden .....</b>	<b>51</b>
<b>An tun e Alla .....</b>	<b>53</b>
	<b>60</b>

Moodi Usmaani Paraya Balde, ko Labe jibinaa hitaande 1949. Ko o gedal Al Hajji Cerno Ismayla e Hajja Fatumata Binta. O jangi Al Qur'aan ka Cerno Siraaju afo Cerno Aliiwa Buuba Ndiyan on e ka Karamoko Abdullaahi Dowsaare. Hitaande 1954, o toddaa tawegol e oo filmu witeedo "La plus belle des vies" moyyinaado Popodara. O naati jande faransi, o jangi ka lekkol arano Kuruula Labe, ka koleesi Cindek e ka liisee Gamal Abdel Nasr. Bay o hebii bakaloriya dimmo, o nawraa Kankan jangoygol ka dudal mawngal. Nder hen, o janni ka liisee Ho Shi Miy Kankan. Ka dudal mawngal, o jangi fii miccaaku e tasakuyee dende, o tentini dun don ka rawnagol jande. Iwi e dun o sektaa, lannoode hitaande 1974, ka Fewjirde Laamu fii Neediji. O golli don e oo sarwuusi witeedo "Direksiyon Planifikasiyon e Statistik". Feyyi e dun o halfinoyaa joddigol ndee Rendirde defte dude mawde e tasakuyee e antal, witeende CEDUST, hitaande 1980, ado o yaade leydi Faransi jangoygol. Hitaande 1986, o halfinaa sarwuusi kippudo on udartangol saatana janganaakuube ben ka rawnagol jandeeji mabbe. O ittaa don, o sektaa Kankan jannoygol. Bay wonii o artiroyaama Konaakiri ka fewjirde laamu jandeeji arani e jandeeji fii ligge e antal, o hafinaa ardagol sarwuusi fii kumpital e maral defte e kaydiji.

Moodi Usmaani, ko ka karamoko mun Teyrno Siraaju adii nanude gimi pular waccoore Nulaado e ko feyyi e dun. Paykun kun tawi dun no lewji, no foti, no hawri; o maanditii; dun wontiroyi mo giggol haala pular, giggol dende afirikiyankooje den. Hitaande 1973, o fuddii yubbude qasiidaaji e fillayeeji.. O yiitidi e pokondoobe makko goo, be sinci hitaande 1991 ngel Kawital Gineyankewal fii Bantal Bindol e Jande ka Dende Leydi men no wiee AGUIPELLN ka haala Faransi. O toddaa wonugol hoore ngal kawtital. AGUIPELLN uuditii footlooji wallisagol gimi, fillayeeji e sifooje haala pular; hubbii dudal ka pular jangetee; yaltinii zurnal witeengal "Dudal".